

Evening Dogri (NSD)

17-12-2025

खबरां

1. प्रधानमंत्री नरेन्द्र मोदी होरें इथोपिया दी संसद दे सांझे इजलास गी संबोधित कीता। उ'नें आखेआ जे वैश्विक दक्खन, आपूं अपना इतिहास लिक्खा करदा ऐ।
2. संसद ने अधिनियमें गी रद्द ते संशोधन करने सरबन्धी बिल 2025 गी पास करी दित्ता ऐ।
3. भारती रेलवे ने ब्रॉड गेज नेटवर्क दे बिजलीकरण दा 99 फीसद कम्म सबूरी करी लैता ऐ ते इस नेटवर्क दा पूरी चाल्ली बिजलीकरण जकीनी बनाने दे बिल्कुल नेडे पुज्जी गोआ ऐ।
4. भारत ने बंगलादेश दे हाईकमिशनर रियाज़ हमीदुल्ला होरें'गी तलब करियै बंगलादेश च बिगड़दे सुरक्षा हालात पर भारत दी गैह्री चैंता व्यक्त कीती।
5. दिल्ली च बधदे प्रदूषण पर काबू पाने लेई कीते जा'रदे सख्त हीलें तैह्त्त कल 18 दिसम्बर थमां पेट्रोल पम्पें पर इक वैध पाल्यूशन अंडर कंट्रोल सर्टीफिकेट दस्से बिजन पेट्रोल जां डीजल नेई थ्होग।
6. भारती फिल्म 'होम बाउंड'गी सर्वश्रेष्ठ अंतर्राष्ट्री फीचर फिल्में दी श्रेणी च 98वें अकैडमी अवार्डें लेई तालेआ गोआ ऐ।

<><><><><><>

PM Ethiopia Joint Session

प्रधानमंत्री नरेन्द्र मोदी होरें इथियोपिया दी संसद दे सांझे इजलास गी अज्ज संबोधित कीता। उ'नें आखेआ जे ओहू इक ऐसी दुनिया दा निर्माण हुं'दा दिक्खना चांह्दे न जेह्दे च वैश्विक दक्खन दे मुल्ख, कुसै दे खलाफ नेई सगुआं हर कुसै दी बेह्तरि लेई प्रमुखता कन्नै अपनी अवाज बुलंद करी सकन। उ'नें आखेआ जे वैश्विक दक्खन दे मुल्ख, आपूं अपनी तकदीर लिक्खा करदे न। श्री मोदी होरें आखेआ जे जिस चाल्ली भारत दे राश्ट्री गीत वंदे मात्रम च धरती गी माता दा दर्जा दित्ता गेदा ऐ उसै चाल्ली इथोपिया दे राश्ट्रगाण च बी धरती गी माता दा स्वरूप गै मित्थेआ गेदा ऐ। एह्दे शा पैह्ले प्रधानमंत्री नरेन्द्र मोदी होरें अदीस

अबाबा च इथियोपिया दे प्रधानमंत्री अबी अहमद अली हुं'दे कन्नै गल्लबात कीती। दौनें नेताएं दपक्खी ते आपसी हितें आहले मुद्दे पर चर्चा कीती। इस दरान 8एं समझौतें पर बी दस्तख्त कीते गो। इंदे च आपसी सरबन्धें गी 'रणनीतिक सांझेदारी' दे स्तर तगर उबड़ा चुक्कना, सीमा शुल्क सैहयोग, इथियोपिया दे बदेश मंत्रालय च इक डेटा केंद्र दी स्थापना, संयुक्त राष्ट्र शांतिरक्षा सिखलाई सैहयोग, जी20 दे तैहत दोआर सरबन्धी पुनर्गठन, मते आई.सी.सी.आर वजीफे ते इथियोपिया दे लोके लेई ए.आई. लघु पाठ्यक्रम शामिल न। भारत दे बदेश मंत्रालय दे सचिव सुधाकर दलेला होरें आखेआ ऐ जे दपक्खी सरबन्धें गी रणनीतिक सरबन्धें दे स्तर तगर उबड़ा चुक्कने कन्नै भारत ते इथियोपिया दे बश्कार सदियें पराने सरबन्धें गी नमें आयाम मिलडन। उनें आखेआ जे भारत ते इथियोपिया शिक्षा ते डिजिटल सार्वजनिक ढांचे आहले खेतर च सैहयोग लेई बशेश रूप कन्नै उत्सुक न। प्रधानमंत्री नरेंद्र मोदी होरें'गी इथियोपिया दे प्रधानमंत्री डॉ. अबी अहमद अली होरें सर्वोच्च पुरस्कार 'द ग्रेट ऑनर निशान ऑफ इथियोपिया'कन्नै सम्मानित कीता। प्रतिनिधिमंडल स्तर दी गल्लबात दे दरान प्रधानमंत्री मोदी होरें आखेआ जे दौनें मुखें दे सरबन्धें गी रणनीतिक सांझेदारी दे स्तर तगर लेई जाने कन्नै सरबन्धें गी नमीं उर्जा, नमीं रफ्तार ते नमीं गैह्राई मिलगा।

<><><><><><>

Prez. TN

राश्ट्रपति द्रौपदी मुर्मु अज्ज तमिलनाडु दे वेल्लोर गेइयां जित्थे तमिलनाडु दे राज्यपाल आर.एन. रवि, सूचना ते प्रसारण राज्य मंत्री डॉ. एल. मुरुगन ते राज्य मंत्री डॉ. एल. गांधी होरें उं'दा सुआगत कीता। राश्ट्रपति होरें मंदर परिसर च इक ध्यान कक्ष दा उद्घाटन कीता। उनें पेरुमल मंदरै च दर्शन ते आरती कीती ते भगवान श्री गणेश ते सोर्ण लक्ष्मी मंदरै च बी पूजा-अर्चना कीती। राश्ट्रपति हुं'दा पूर्णाकुंभ दे कन्नै सुआगत कीता गेआ। राश्ट्रपति होरें मंदर परिसर च इक बूहटा बी लाया। श्रीपुरम अरियूर नारायणी मंदिर वेल्लोर च सौ कमाहू इलाके च स्थित ऐ। एहू मंदिर सुन्ने कन्नै बने दा ऐ ते एहूदे परिसर च इक मेडिकल कॉलेज ते अस्पताल बी ऐ। राश्ट्रपति 16 थमां 22 दिसंबर तगर कर्नाटक, तमिलनाडु ते तेलंगाना सने दक्खनी राज्यें दे दौरे पर न।

<><><><><><>

Hyderabad President

राष्ट्रपति द्रौपदी मुर्मू अज्ज दपैह्नी तेलंगाना दी राजधानी हैदराबाद दे हकीमपेट ब्हाई अड्डे पर पुज्जिया। श्रीमती मुर्मू आंध्र प्रदेश दे तिरुपति थमां अपनी सलाना दक्षिणी जात्तरा पर आइयां हिआं ते सिकंदराबाद दे बोलारम स्थित राष्ट्रपति निलयम लेई रवाना होई गईयां। राष्ट्रपति हुं'दा दफ्तर अगले 6एं दिनें यानि इस महीने दी 22 तरीक धोहड़ी राष्ट्रपति निलयम च कम्म करग। राष्ट्रपति इस महीने दी 19 तरीक गी बक्ख-बक्ख राज्ये दे लोक सेवा आयोग दे अध्यक्षे दे राष्ट्री सम्मेलन दा उद्घाटन करडन ते इस महीने दी 20 तरीक गी गचीबौली च ब्रह्मा कुमारिये आसेआ आयोजित 'भारत दा शाश्वत ज्ञान - शांति ते प्रगति दे मार्ग' विशे पर सम्मेलन च हिस्सा लैडन। तेलंगाना दे राज्यपाल जिष्णु देव वर्मा, उपमुख्यमंत्री भट्टी विक्रमार्क, राज्य दे मुख्ख सचिव के. रामकृष्ण राव ते पुलस महानिदेशक शिवधर रेड्डी होरे ब्हाई अड्डे पर राष्ट्रपति हुं'दा सुआगत कीता। इस मौके पर थेआरबंद बले दे केई वरिष्ठ अधिकारी बी उत्थे मजूद हे।

<><><><><><>

Repealing and Amending bill

संसद ने अधिनियमें गी रद्द ते संशोधित करने सरबन्धी बिल 2025 गी पास करी दिता ऐ। लोकसभा ने इस बिल गी कल अपनी मंजूरी देई दिती ही जिसलै के राज्यसभा ने अज्ज एह बिल पास कीता ऐ। एह बिल, किश अधिनियमें गी रद्द करने ते किश होरने अधिनियमें गी संशोधित करने दी खुल्ल दिं'दा ऐ। एह बिल पराने 71 कानूनें गी रद्द ते 4 होरने कानूनें गी संशोधित करने दा कम्म करग। एह बिल आपदा प्रबंधन कानून 2025 च बी तरमीम करग। केन्द्री विधि ते न्याऽ मंत्री अर्जुन राम मेघवाल होरे आखेआ ऐ जे एह बिल, बपार-कारोबार ते जीन जीने दे तौर-तरीके गी सखल्ला बनाने दी दिशा च इक महत्वपूर्ण गैह ऐ।

<><><><><><>

LS Railway Electrification

भारती रेलवे ने ब्रॉड गेज नेटवर्क दे बिजलीकरण दा 99 फीसद कम्म सबूरी करी लैता ऐ ते इस नेटवर्क दा पूरी चाल्ली बिजलीकरण जकीनी बनाने दे बिल्कुल नेडे पुज्जी गेआ ऐ। अज्ज लोकसभा च इक सोआलै दे लिक्खियै दित्ते गेदे परते च रेल मंत्री अश्विणी वैशणव होरे आखेआ जे जित्थे तोहड़ी रेलवे बिजलीकरण दा मामला ऐ तां भारत एहदे च केई मुख्खे कोला बड़ा अगगे ऐ। उनें दस्सेआ जे यूनाइटेड किंगडम च एह कम्म छड़ा 39 फीसद, रूस च

52 फीसद ते चीन च 82 फीसद गै कीता गेदा ऐ। उ'नें इब्बी दस्सेआ जे रेलवे दे 14 ज़ोनें ते 25एं राज्यें ते केन्द्र शासत प्रदेशें च रेलवे दे 100 फीसद बिजलीकरण दा लक्ष्य हासल करी लैता गेदा ऐ। मंत्री होरें गलाया जे इस कम्मै गी इक मिशन आहली भावना कन्नै तोढ चाढेआ जा'रदा ऐ। श्री वैश्वणव होरें इब्बी दस्सेआ जे 2014 शा पैहले 21 ज्हार रूट किलोमीटर दे ब्रॉड गेज नेटवर्क पर बिजली दा कम्म कीता गेआ हा जिसलै के अज्ज एहू आंकड़ा तकरीबन 47 ज्हार रूट किलोमीटर तगर पुज्जी गेदा ऐ।

<><><><><><>

Ashwani-Rail Accident

रेल मंत्री अश्विनी वैश्वणव होरें आखेआ ऐ जे पिछले केइएं ब'रें दरान कीते गेदे सुरक्षा सरबन्धी उपाएं दे नतीजतन, रेल हादसों दी गिनतरी च बड़ी कमी दिखने गी लब्बी ऐ। उ'नें दस्सेआ जे सरकारै 2014 थमां 2025 दी अवधि दरान सरकार दे बक्ख-बक्ख जत्तें दी बदौलत रेल हादसों च 90 फीसद तगर दी कमी दर्ज कीती गई ऐ। मंत्री होर अज्ज लोकसभा च सोआलें दे समें दरान जिमनी सोआलें दा परता देआ करदे हे।

<><><><><><>

LS Murugan Prasar Bharti

सूचना ते प्रसारण मंत्री डाक्टर एल. मुरुगन होरें आखेआ ऐ जे प्रसार भारती ने कन्टेंट सिंडिकेशन नीति 2025 दा मसौदा तैयार करी लैता ऐ तां जे सांस्कृत पुज्ज आहले दायरे दे विस्तार ते प्रसारण समग्री थमां पैसे कमाने दे कन्नो-कन्नो सार्वजनिक सेवा आहले मकसद गी बी बरकरार रक्खेआ जाई सकै। अज्ज लोकसभा च लिक्खियै दित्ते गेदे इक परते च डाक्टर मुरुगन होरें आखेआ जे इस नीति दा मकसद, दूरदर्शन ते आकाशवाणी आसेआ प्रसारत कीती जा'रदी समग्री थमां पैसे कमाना ऐ। उ'नें आखेआ जे इस नीति दे तैह्त्त प्रसारण भारती दे ओटीटी प्लैटफार्म पर चलने आहली डिजिटल समग्री गी आहने पर बी बचार कीता जा'रदा ऐ। उ'नें दस्सेआ जे इस मसौदे गी लोकें थमां मशवरे हासल करने दे मकसद कन्नै प्रसार भारती दी वैबसाईट पर बी चाढेआ गेआ हा।

<><><><><><>

Cyber Fraud

सरकार ने आखेआ ऐ जे सिटीजन फाइनेंशियल साइबर फ्रॉड रिपोर्टिंग एंड मैनेजमेंट सिस्टम दे माध्यम कन्नै हासल हुनै तगर 23 लक्ख शा मती शकैतें च 7 ब्हार करोड़ रुपें शा मते दी बचत कीती गई ऐ। गृह राज्य मंत्री बंडि संजय कुमार होरें अज्ज राज्यसभा च इक सोआलै दे लिक्खियै दित्ते गेदे परते च दससेआ जे माली धोखाधड़ी दे मामलें च फौरी रिपोर्टिंग ते जालसाजें आसेआ पैसे दी हेराफेरी रोकने लेई 2021 च इस प्रणाली गी शुरू कीता गेआ ह। उ'नें दस्सेआ जे मंत्रालय ने देशै च साइबर अपराध गी रोकने, ओहदा पता लाने ते जांच ते अभियोजन दे मकसद कन्नै इक ढांचा ते तंत्र विकसित करने गितै भारती साइबर अपराध समन्वय केंद्र दी स्थापना कीती ऐ। श्री कुमार होरें आखेआ जे साइबर अपराध दी जांच च सैहयोग ते समर्थ निर्माण गी मजबूत करने आस्तै इस ब'रे जनवरी च तालमेल केंद्र स्थापत करने आस्तै गृह मंत्रालय ते अमरीका दे गृह सुरक्षा विभाग बश्कार इक समझौता ज्ञापन पर दस्तखत कीते गे न। उ'नें दस्सेआ जे ऑनलाइन साइबर शकैतां दर्ज करने च मदाद हासल करने लेई इक टोल-फ्री हेल्पलाइन नंबर - 1930 बी शुरू कीता गेआ ऐ।

<><><><><><>

Sitharaman-IEC

वित्त मंत्री निर्मला सीतारमण होरें आखेआ ऐ जे पिच्छले इक दहाके च मुल्ख ने हर खेत्तर च जबरदस्त विकास कीता ऐ। अज्ज नमीं दिल्ली च भारती आर्थिक सम्मेलन गी संबोधित करदे होई श्रीमती सीतारमण होरें आखेआ ऐ जे देश ने माली समावेशन, कार्यबल च महिलाएं दी भागीदारी, बेहतर पोषण दे कन्नो-कन्नो परोआरें लेई माली ते बैंकिंग पुज्ज गी जकीनी बनाने च महत्वपूर्ण जोगदान दित्ता ऐ। खजाना मंत्री होरें आखेआ जे सरकारै आम नागरिकें दे तय प्रीमियम पर घटोघट्ट बुनियादी बीमा जकीनी बनाया ऐ, जेहड़ा बिल्कुल बी बोझ नेई लगदा ऐ। उ'नें आखेआ जे लौहके उद्यमियें लेई बी सरकार ने सिड़कें गी जरनैली सिड़कें कन्नै जोड़ने, बजारै तगर पुज्ज बनाने ते समग्र सेहत सेवा जकीनी बनाने पर ध्यान केन्द्रित कीता ऐ।

<><><><><><>

India-Bangladesh

भारत ने अज्ज बंगलादेश दे हाईकमिशनर रियाज़ हमीदुल्ला होरें'गी तलब करियै बंगलादेश च बिगड़दे सुरक्षा हालात पर भारत दी गैह्री चैंता व्यक्त कीती। बदेश मंत्रालय ने इक बयान च आखेआ ऐ जे बंगलादेश दे हाईकमिशनर होरें'गी किश कट्टरपंथी लोकें दिएं माड़ी गतिविधियें दे बारै च दस्सेआ गोआ ऐ जि'नें ढाका च भारती मिशन दे नेड़े सुरक्षा सरबन्धी माड़े हालात पैदा करने दी भैड़ी योजना बनाई दी ऐ। भारत ने आखेआ ऐ जे ओहू बंगलादेश च हाल दिएं किश घटनाएं दे बारै च इ'नें कट्टरपंथी तत्वे आसेआ फैलाई जा'रदी झूठी कहानिएं गी पूरी चाल्ली खारज करदा ऐ। मंत्रालय ने इस स्थिति गी मंदे भागें आहली करार दित्ता ते आखेआ जे अंतरिम सरकारै नां ते जांच कीती ते नां गै घटनाएं दे बारै च भारत दे कन्नै सबूत सांझे कीते।

<><><><><><>

Jadhav WHO Global Summit

पारंपरिक दवाईएं बारै विश्व सेहत संगठन दे दुए वैश्विक शिखर सम्मेलन दा अज्ज नमीं दिल्ली दे भारत मंडपम च विश्व सेहत संगठन ते आयूश मंत्रालय आसेआ सांझे तौर पर आयोजन कीता गोआ। इस मौके पर किट्टे अगो भाशण दिंदे होई आयूश मंत्री प्रताप राव जाधव होरें पारंपरिक दवाईएं आहले खेत्तर च भारत दे लम्मे तजुर्बे पर लोऽ पांदे होई शोध, गुणवत्ता सरबन्धी मानकें ते वैश्विक सैह्योग गी मजबूत बनाने दे महत्वै पर जोर पाया। उ'नें गलाया जे 2016 च शुरु होए दा एहू सैह्योग, वैश्विक स्तर पर पारंपरिक दोआइएं आहले खेत्तर गी उबड़ा चुक्कने च बड़ा महत्वपूर्ण साबत होग। तोआई विश्व सेहत संगठन दे महानिदेशक डाक्टर टेडरोस एदहेनोम गेबरियासुस होरें विज्ञान ते परंपराएं बश्कार पुल कायम करने दे महत्वै पर अपने बचार सांझे कीते।

<><><><><><>

Delhi UC Certificate

दिल्ली च बधदे प्रदूषण पर काबू पाने लेई कीते जा'रदे सख्त हीलें तैहत कल 18 दिसम्बर थमां पेट्रोल पम्पें पर इक वैध पाल्यूशन अंडर कंट्रोल सर्टिफिकेट दस्से बिजन पेट्रोल जां डीजल नेई थ्होग। पेट्रोल पम्पें गी बी एहू जिम्मेदारी दित्ती गेई ऐ जे ओहू एहू सर्टिफिकेट चैक करन ते एहदे नेई होने पर पेट्रोल जां डीजल गाहक गी नेई दित्ता जा। एहू गैहू सरकार नै ब्हाउ दे मय्यार च सुधार आहनने दी मंशा कन्नै लैता ऐ। जारी निर्देश मूजब पेट्रोल पम्प कैमरें ते सिस्टम दे राएं एहू जांच करडन जे गड्डी दा प्रदूषण सर्टिफिकेट जायज ऐ जां नेई।

गड्डी चालकें गी बी सलाहू दित्ती गेई ऐ जे ओहू बिजन खुंजें अपनी गड्डी दी प्रदूषण जांच कराइयै वैध प्रदूषण सर्टिफिकेट अपने कन्नै रखन तांजे उ'नेंगी कुसै असुविधा दा सामना नेई करना पवै।

<><><><><><>

SIR-WB

पच्छिम बंगाल च मतदाता सूचिएं दी बशेश नजरसानी आहली प्रक्रिया दे बाद 58 लक्ख नांऽ कट्टे जाने आले मामले पर बीजेपी दे राज्य प्रधान ते शिक्षा राज्यमंत्री सुकांता मजूमदार होरें आखेआ ऐ जे मीडिया दिएं रिपोर्टें मूजब बंगाल च 1 करोड़ शा मते संदिग्ध मतदाता न। उनें आखेआ जेगर अज्ज कुसै दा नांऽ कट्टेआ जंदा ऐ कीजे उ'नें स्हेई समें पर सी.ए.ए लेई आवेदन नेई कीता तां ममता बनर्जी होरें गी एहदे लेई जिम्मेदारी लैनी होग।

<><><><><><>

Trump-Venezuela

अमरीकी राष्ट्रपति डॉनल्ड ट्रम्प होरें आखेआ ऐ जे ओहू वेनेजुएला दे अंदर ते बाहर जाने आले सभनें तेल टैंकरें पर पूरी चाल्ली रोक लाने दा हुक्म रसाल करा'रदे न। टुथ सोशल मंच पर इक पोस्ट च ट्रम्प होरें आखेआ ऐ जे वेनेजुएला दे नेता निकोलस मादुरौ हुं'दी सरकार इक बदेशी आतंकवादी संगठन ऐ ते ओहू अमरीकी संपत्तिएं दी चोरी करा'रदे न। उंदी एहू टिप्पणी वेनेजुएला आले समुंदरी कंठुं पर अमरीका आसेआ तेल दा इक टैंकर जब्त कीते जाने दे बाद आई ऐ। तोआई, इक बयान च वेनेजुएला दी सरकारै ट्रम्प हुं'दी इस धमकी गी खारज करी दित्ता ऐ।

<><><><><><>

OSCAR

मन्ने-परमन्ने दे फिल्म डरैक्टर नीरज धेवान हुं'दे आसेआ निर्देशित भारती फिल्म होम बाउंड गी सर्वश्रेष्ठ अंतरराष्ट्री फीचर फिल्में दी रेणी च 98वें अकैडमी अवार्डें लेई तालेआ गेआ ऐ। होम बाउंड ओकड़ी 15एं फिल्में चा इक ऐ जिनें'गी ऑस्कर्स-2026 दी अंतरराष्ट्री फीचर फिल्म श्रेणी च अखीरी नामजदगिएं लेई योग्य मन्नेआ गेआ ऐ। 98में अकैडमी अवार्ड अगले ब'रे 15 मार्च गी दित्ते जाडन।